

滑縣志卷十

孝弟

孝弟之事根於天彝士君子讀書志道自應接跡曾
閔而史傳所載反多里巷之士險夷常變竭力忘身
至性至情不待勉強彼乘車列鼎之流緣飾多而天
性衰仁人君子所爲咨嗟興嘆也夫孔門爲仁以孝
弟爲本孟子言堯舜之道盡於孝弟是故正人心維
風俗斷自孝弟始矣

隋

華秋臨河人幼喪父事母以孝聞家貧傭賃養母母
病秋容貌毀悴鬢髮頓改母卒絕櫛沐髮盡禿落廬
於墓側負土成墳人欲助者輒拜止之大業初調狐
皮郡縣大獵見一兔奔入秋廬匿秋膝下獵人異而
免之自爾此兔常宿廬口馴擾左右郡縣嘉其孝感
以狀聞降使勞問表其門閭後羣盜起往來廬之左
右咸相戒曰勿犯孝子鄉賴秋全者甚眾

按明一統志臨河在

開州西六十里本漢黎陽地
隋析置臨河縣金省入開州

宋

侯義家貧備田以事母母卒負土築墳夜則哭於柩
側踰年墓間木生連理野鴿馴而不去嘗遇盜劫其
衣旣而知爲義物悉還之

明

宋濂字維周任濱州同知政尙平易居家甚孝廬墓
三年有羣賊夜過索火濂端坐厲言盜感愧拜謝而
去

國朝

閻祺朱印哲作弟弟傳弟弟傳者何傳華平閻生也

閻生內行醇備孝友兼稱獨云弟弟者何以弟弟著節也生諱祺字敬迓別號華平其先祖鼇由沁水遷滑祖壽齊公諱年始踞起登賢書任鎮平醴泉兩邑宰以清惠著舉丈夫子三長敏學太學上舍領孟津簿季蚤逝仲卽膚施公諱敏政明經高等秉鐸甯晉甯晉固才藪公能振起人文轉膚施諭時仲子樞部君捷南宮公遂拂袖歸舉丈夫子五生其季也數齡失恃繼世父孟津公嗣聰慧醇謹有至性孟津公居官廉宦邸之需悉取宮中坐是產日削謝政歸不獨

兩袖清風且家徒壁立矣生婉曲以娛親志孟津公
得一觴一詠以樂餘年出就外塾與仲兄相追隨一
步一趨奉爲楷模孟津公捐館舍生哀毀盡禮時母
楊稱未亡人甘臠之奉備極豐腆至於自處以儉約
自甘乙亥遊膠序及母楊告終生哀毀一如孟津公
捐館日閻氏於白馬號文獻鼎族迨樞部君貴衣冠
蟬聯三世而四矣生敝衣羸馬遇之者不知爲貴介
子弟甲申逆賊蹂躪至滑勒樞部君郊關欲立索數
千金樞部君宦橐如洗窘莫以應時士民雲集生衣

冠長跪號於通衢垂泣再拜禱於士民將以死爭之
樞部君素得人心眾且激于生之義也羣起而稱屈
者數千人賊威爲之頓戢及僞令視事復比捐輸羈
諸紳于公署生率弟姪泣懇公堂情詞迫至僞令咸
動且鬻產傾貲以緩兄急尤人所難後賊擄樞部君
而西也生憤不避難欲與兄俱追躡弗及未幾道梗
音杳使者裹足生慨然流涕曰兄投荒西陲生還無
期吾爲人弟而生棄其難吾心何忍遂治裝挺身長
往備歷艱阻形僣力竭始達隴右之兩當兄弟握手

吞聲恍如再世居無何樞部君謂生曰吾家先隴盡
在滑吾兄弟居於此若俱死其如先隴何弟盍歸生
恐重違兄志飲涕而東夫何鵠鵠之翼方分虎狼之
威旋罹方賊之初獲生也環又語之曰若從我可不
死生乃怒目厲聲曰吾爲清白吏子孫豈從汝羣賊
壯之猶從容進之食生又厲聲曰吾家累世清白誓
不飲貪泉之水况此不義之食哉且吾數千里而至
爲吾兄也今得見兄吾志遂矣死何恨羣賊見其抗
志不屈知其不可奪也遂遇害樞部君聞之悲號尋

至尸所但見生顏色如生猶若喜於見兄狀遂畏其
遺骸負至兩當兩當士民爲生聚哭而罷市者累日
非生之孝友根於至誠亦烏能百折不回之死靡他
哉始焉輕犯克鋒以救兄難勇也旣而涉遠冒險以
身從兄義也終焉慷慨殺身以命殉兄仁也三德備
而生之死爲不朽矣野史氏曰甲申之變予與樞部
君實同患云予向識季子而見其恂恂若不及也至
其從兄殉難抑何其志堅金石而氣凌霄漢哉樞部
君痛念弟歿肝腸寸裂癡泣以歸弟覩嘔心而撫遺

孤季子死乎不死矣予言何足不朽季子存之以爲
編史者之嚆矢祠鄉賢

潘龍鱗字披赤候選訓導持己莊嚴接物和平事繼
母以孝聞直指桑旌其門

張燦字玉潤號鶴菴甲午舉人事繼母至孝待弟友
愛性孤介彈琴賦詩不喜交接除授中部令未仕卒
任啟泰字青巖庚戌進士性孝友授詹事府正字早
卒人咸惜之

劉源浩字宿海號崙菴深弟拔貢幼而失怙兄撫之

成立源浩事兄如事父深歿撫諸姪與子均朝夕訓
迴咸登仕籍

吳大來縣諸生弟大智俱孝友父成奇性卞急大來
見父有怒色百計寬解必得歡悅而後已父沒事母
彌謹母患癱五年兄弟未常一夕解衣年六十餘同
居不忍分析尤篤於親誼從父國賢家貧迎養於家
爲從孫學會婚娶舅氏張五德居淇縣聞病篤迎至
家閱兩月舅死具棺殯葬中表待以舉火者復數人
于同雲性孝友嘗讓產於兄弟少受業於同邑張來

泰雍正六年來泰舉優以知縣用赴閩同雲偕往來
秦之任閩清七日病故柩不能歸同雲欲歸謀之而
孤櫬在旅不忍去乃寄書至家賣已地五十畝得百
三十金扶柩回籍其篤於行誼如此

祁琛太學生輕財好義姪宏祉貧無立錫析己屋居
之日陞貧而有志讀書留於家供其膏火

李子望善事父母女兄二適人後家皆貧子望各爲
置地數十畝復爲其甥婚嫁

張經文性友愛兄綉文家口眾讓分地十畝與之姊

適杜氏夫亡貧無以殮經文爲之殮復爲甥成功娶妻

任元良貢生素好施族叔性善年老家貧元良周其衣食歿爲殮殮以己地葬之嘗買王氏女爲婢後女之舅備價來贖元良乃知爲有夫之女卽令領回不取身價族子恭不能娶元良爲營室二間資以衣服麥米乃得成婚

李文星兄文秀早故文星事孤嫂撫姪宏勲思禮備至姪長析產之美者與之族人文奎夫婦病歿不能

葬文星爲之殯本邑曹村坡有南北通衢長八百餘步乾隆四年被水後益殘壞居民張楚白等議築路濬濠值文星地三畝在內眾難之文星卽盡捐其地爲路而自完租賦

闔珠天性醇厚族叔嘉訓年邁無依珠瞻養之病終爲營殯葬且給已墳地十二畝以爲孤子度日親友貧乏時爲周濟又助里人趙玉等銀娶婦羣謂不愧義士之裔

于秉天性醇厚睦族恤鄰從兄佩家貧子幼秉時資

之後佩故撫其子嗣孔尤摯爲置產娶婦族子鳳池
客死上蔡子隨無力搬柩秉助之銀乃得歸葬鄰人
王瑞有一女已許人爲室復賣與阮姓爲婢後其夫
家來娶瑞無力回贖秉卽助銀贖歸婚配其他親黨
生無以養死無以葬秉力爲周恤者甚眾

楊於朝字欽鄰孝友端慤言行不苟居鄉恂恂人皆
愛之所著有生平言行錄及五常編

王教字振鐸父母俱早世待幼弟甚友愛式好無間
及弟卒撫姪與子無二居鄉樂善不倦親友有以緩

急告者力爲周恤修曹河渡以便行人康熙四十二年六十一年兩遭歲歉散粟助賑舉鄉飲賓

李奇芝性孝友父先亡母孀居先事承志或不怡必曲爲解歡乃已次子乾健常製一湯壺奉之芝屏之曰家中惟爾祖母有此我安得用兄奇蔚性卞急芝曲意事之及卒撫姪甚摯又好施予嘗與從子珺出粟五十石賑飢母卒水漿不入口者三日及葬哀痛彌切竟以毀卒

張掄英幼爲張會極養子娶妻關氏素性孝友田止

清原元
卷一
數畝賣饅餠爲生會極有子二人析產後俱窮乏掄
英獨竭力事會極夫婦會極次子喪妻遺一子未滿
三歲關爲撫養與己子無二鄉黨咸稱之

李聯芳性友愛兄廷芳貧鬻其二子時聯芳亦貧後
稍豐贖歸爲之婚娶復析產與之

謝秀字芳儒邑庠生事繼母以孝聞兄弟友愛寸絲
粒粟不私諸己性好學至老不倦年九旬餘耳目聰
明如少壯

郭聰字冠軍食餼郡庠幼有至性事繼母曲盡色養

伯父早世無嗣伯母寡居聰瞻給甚至性敦友誼重然諾家雖貧有以急告者推解無吝色

王光義字遇侯性淳朴事親最孝與異母兄光先曲盡友愛白首無間爲人慷慨好義然諾不欺

袁德彰字儀文號蘊和雍正乙卯拔貢性至孝事祖父母父母色養備至母病侍左右夜不敢安枕久而不懈叔祖父母無嗣愛敬盡禮與事親無異持身廉介接物和易敦宗睦里樂善好施嘗於內黃道中拾遺金求得其人還之郡守馬邑令姚前後以優行舉